

Date – 05/03/2026

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

- 1. Vawiin chawhma dar 10 leh a chanve atangin Assembly Budget session chhunzawm leh ani dawn a, Minister te department enkawlina atana budget sum ruahman sawiho a ni ang.**
- 2. Kumin February ni 16 thleng khan ram chung mi state dang atanga Mizorama lo zin tum mi nuai 3, sing 3, sang 6 leh 808 te hnenah Inner Line Permit (ILP) pek chhuah an ni.**
- 3. Central YMA Executive Committee thukhawm chuan Assembly thuthkawma ‘The Mizo Marriage and Inheritance of Property (Amendment) Act, 2026’ Assembly pass chu hnamdang pasala neih a that loh zia tarlanna tha taka an ngaih thu an sawi.**
- 4. Prime Minister Narendra Modia chuan Kuwait, Qatar leh Oman hruaitute biain tunhnaia beih an tawk ve chu a dem thu a hrilh.**

<><><>

ASSEMBLY SESSION

Vawiin chawhma dar 10 leh a chanve atanga Assembly Budget session chhunzawm lehin a Dr. Vanlalhlana leh Pu C. Lalsawivunga te department enkawlina atana budget sum ruahman sawiho a ni ang a, pawm nghal tum a ni ang.

Vawiin Assembly inkhawmah hian zawhna leh chhanna hun hman a ni ang a. Chumi zawhah Social Welfare Minister Pi Lalrinpui-i'n The Mizoram Drug Treatment cum Rehabilitation Centre Accreditation Rules, 2026 copy chu House dawhkanah a dah ang a. Supply Minister Pu B. Lalchhanzova'n The Mizoram Legal Metrology (Enforcement) (Amendment) Rules, 2025 leh The Mizoram Food Security (Amendment) Rules, 2025. te chu House dawhkanah a dah bawk ang a. Pu Jeje Lalpekhlu-a'n Committee on Petitions Report 4-na, Agriculture & Farmers' Welfare department chungchang chu House-ah a pharh bawk ang.

Hemi hnu hian Dr. Vanlalhlana leh Pu C. Lalsawivunga te department enkawlina atana budget sum ruahman sawiho a ni ang a, zawhfel a pawm hman tum a ni ang a. Dr. Vanlalhlana department chante enkawlina tur sum ruahman hi a vaiin cheng vaibelchhe 2,244, nuai 12, sing 2 leh sang 9 a ni a. Chu'ngte chu cheng vaibelchhe 1,919, nuai 25 leh sang 8, senna tur ruahmanna School Education, cheng vaibelchhe 319, nuai 10 leh sang 1 senna tur Higher & Technical Education leh cheng vaibelchhe 5, nuai 77 leh sing 2 senna tur ruahmanna Information & Communication Technology te a ni. Pu C. Lalsawivunga department chante enkawlina tur pawisa ruahman hi a vaiin cheng vaibelchhe 910, nuai 50, sing 4 leh sang 5 a ni a. Chu'ngte chu cheng vaibelchhe 16, nuai 50, leh sang 4 hmanna tur Art & Culture, cheng vaibelchhe 689, nuai 16, sing 8 leh sang 5 hmanna tur District Council & Minority Affairs,

cheng vaibelchhe 126, nuai 62, sing 2 leh sang 1 hmanna tur Horticulture leh cheng vaibelchhe 78, nuai 21, sing 3 leh sang 5 hmanna tur Animal Husbandry & Veterinary te a ni.

<><><>

ASSEMBLY-VACANT POSTS

Home Minister Pu K.Sapdanga'n Mizoram Police Department-ah post ruak 4,666 a awm mek a, hnathawktu lak thar tumna a awm thu a sawi.

Assembly budget session kal meka ziaka zawhna chhangin Home Minister chuan Home Department, Mizoram Police hnuai Rank /grade/ unit hrang hrangah sanction post sing 1, sang 2,228 a awm tih sawiin, chung zinga post 7562 chu luah niin, tun dinhmunah post ruak 4,666 a awm mek a, post lak thar tumna a awm tih a tarlang a ni. Pu K Sapdanga chuan, Assembly budget session kal mekah Police an indaih lo hle tih sawiin, tun dinhmunah Mizoram police hnuai post ruak battalion 4 daih a awm mek a, hetihlai hian police post ruak te hnawh khat turin sorkar sumn a daih chiah lo tih House a lo hrilh tawh a ni.

<><><>

ASSEMBLY-ILP

Kum 2024-25 leh kum 2025 atanga kumin 2026 February ni 16 thleng khan ram chung mi state dang atanga Mizorama lo zin tum mi nuai 3, sing 3, sang 6 leh 808 te hnenah Inner Line Permit (ILP) pek chhuah an ni a, ILP dil zingah insa a inhlawhfa, Mistiri leh Helper an tam ber.

Assembly Budget Session neih mekah Home Minister Pu K. Sapdanga chuan MNF member Pu Lalchandama Ralte zawhna ziaka chhangin kum 2024-2025 khan ILP nuai 1, sing 6, sang 3 leh 368 pek chhuah a ni a, kum 2025 atanga kumin 2026 February ni 16 thleng khan ILP nuai 1, sing 7, sang 3 leh 440 pek chhuah a ni baw a ti a. Hei bakah hian Home Minister chuan Assembly budget session neih meka Lawngtlai West bialtu Pu C.Ngunlianchunga zawhna ziaka a chhan danin, kum 2024 leh 2025 chhunga ILP pek chhuah atanga sum hmuh zat chu cheng vbc 15, nuai 12, sing 4, sang 1 leh 725 a tling a, hemi kum chung vek hian ILP nei lo leh ILP thi tawh thawn kir mi 1,117 an awm tih a tarlang baw a ni.

Akashvani News Aizawl RTI zawhna chhangin, Mizoram District hrang hrang Deputy Commissioner office te leh Shillong leh Silchar Mizoram House Deputy Resident Commissioner te chuan kum 2025 chhunga India khua leh tui state dang atanga Mizorama lo zin tum ILP pek chhuah zingah Assam mite an tam ber a, Assam bakah hian Bihar, Jharkhand, Tripura, Meghalaya, West Bengal, Uttar Pradesh, Odisha leh Rajasthan te chu a tam zualte an ni a, ILP dil zingah insa-a inhlawhfa, Mistiri leh Helper an tam ber a, zinmi (tourist) leh sundawna thila lo zin an awm baw tih an sawi a ni.

<><><>

CYMA

Central YMA Executive Committee thukhawm chuan Assembly thuthkawma 'The Mizo Marriage and Inheritance of Property (Amendment) Act, 2026' Assembly pass chu hnamdang pasala neih a that loh zia tarlanna tha taka an ngaih thu an sawi.

Nizanah thutkhawmah hian tunhnaia Mizoram State Legislative Assembly in ‘The Mizo Marriage Divorce and Inheritance of Property Act, 2014’ mek siam thatna (Amendment Bill) ‘The Mizo Marriage and Inheritance of Property (Amendment) Act, 2026’ a pass chu Mizo hmeichhia hnamdang pasala nei te a huam loh avangin hnamdang pasala neih a that loh zia leh paw zia tarlanna tha takah an ngaih thu an sawi a, YMA Inkhawmpui Lian vawi 75-na, kum 2025 October thlaa Sakawrdai-a neih ah YMA Khawih No.3-na “Mizo hmeichhia ten hnamdang pasala an neih zel loh nan Central YMA hian inzirtirna nasa zawkin kalpui rawh se’ tih rel a lo ni baw avangin hetiang hnam humhalhna leh himna tura Mizoram State Legislative Assembly in Bill a pass chu lawmawm antih thu an sawi a ni.

<><><>

ASSEMBLY-GINGER

Mizoram sorkarin kum 2024 atanga kumin 2026 January chhungin sawhthing leina atan cheng vbc 141, nuai 16, sing 8, sang 4 leh 410 a seng a, Sawhthing hralhna atangin cheng vbc 12, nuai 78, sang 7 leh 290 a hmu let.

Assembly Budget session kal mekah Tuirial bialtu Pu K.Laldawngliana zawhna ziaka chhangin Agriculture Minister Pu P.C. Vanlalruata chuan kum 2024 atanga kumin 2026 January chhunga thlai thar lei tura thlan bik sorkarin a lei dan tarlangin, Sawhthing quintal nuai 3, sing 4, leh 98 lei nan cheng vbc 141, nuai 16, sing 8, sang 4 leh 410 a seng a, Sawhthing hralhna atang hian cheng vbc 12, nuai 78, sang 7 leh 290 hmuh let a nih thu a tarlang a. Hei bakah hian Hmunphiah ro quintal 2,497 chu ZOHANDCO kaltlangin a lei a, Buhhum quintal 4,156 leh kg 8 chu cheng nuai 124, sing 6, sang 9 leh 860-in lei a nih tawh thu a tarlang a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

ASSEMBLY-E-OFFICE

DP&AR Minister Pu K.Sapdanga’n tun dinhmunah office panga-ah e-Office kal pui a ni tawh a, langtlang Sorkar siamna atan a tangkai hle a ti.

Assembly Session kal meka ziaka zawhna chhangin DP&AR Minister chuan e-office chu Paper hman lovin file leh document-te kaltir a nih avangin Paper mana insen teuh teuh a ngaih loh bakah, a felfai a, file chhui zung zung a tih awlsam bakah Document-te awlsam taka zawn chhuah mai a ti-awlsam a ti a. Minister chuan e-Office chhungah him taka document-te dah that an nih avangin kangmei leh chhiatna dang lakah pawh a him hle tih sawiin, e-Office chhungah file kal dante a lang chiangin, lang tlang Sorkar siamna lamah a tangkai hle a ti a. Hna thawhna-ah file kal kualtir zung zung a awlsam avangin a tangkai hle a ti a, e-Office atang hian file zawn chhuah, a hmanhmawh thlak dan azira kal kualtir, awlsam taka a kawltu leh a kalna chin zawn chhuahte a awlsam a, hna thawh a ti awlsamin, hlawk zawkin hna a thawh theih phah a ti

a. e-Office-a file-te chu Officer credentials neite chauhin an en theih avangin a him bawk tih a tarlang a ni.

Minister chuan tun dinhmuna e-office kalpuina office 5 (panga) te bakah Aizawl District, Champhai District, Khawzawl District, DC, Kolasib District, Lawngtlai District leh Saitual District a office 23 ah te e-office kalpui leh tumin hma an la leh mek tih a tarlang bawk a ni.

<><><>

ASSEMBLY-HOTEL

Mizorama hotel hrang hrang zingah Ministry of Tourism guidelines anga star rating nei pha pakhat chauh a awm.

Assembly Session kal mek a Leader of Oppostion Pu Lalchhandama Ralte zawnha ziaka chhangin Tourism Minister Pu Lalnghinglova Hmar chuan Hotel Ransam, Thuampui Vengthar, Aizawl chu Ministry of Tourism guidelines ang a Mizorama star rating nei pha awmchhun a nih thu sawiin, kum 2024 September ni 6 khan Ministry of Tourism, Government of India chuan kum 5 chung atan 3 star certification a hlan tih a tarlang a ni.

<><><>

PM

Prime Minister Narendra Modia chuan Kuwait, Qatar leh Oman hruaitute biain tunhnaia beih an tawk ve chu a dem thu a hrilh. PM Modia hian heng ramte hi an thuneihna leh mahnia inrelbawl ram an nihna chu palzut sak an nih thu a sawi a. Hetihlai hian India mite himna tura theihtawp an chhuahpui avangin lawmthu a hrilh a ni. Prime Minister Modia chuan Asia khawthlang lam buaina chu dawhkana inbiaa sawihoa a hma thei ang bera remna leh muanna siam a tul thu a sawi bawk a ni.

Prime Minister Modia hain Kuwait Crown Prince Sheikh Sabah Al-Khaled Al-Hamad Al-Mubarak Al-Sabah leh Sultan of Oman Haitham bin Tarik bakah Amir of Qatar, Sheikh Tamim bin Hamad Al Thani te a biak thu hi social Media lamah a tarlang a ni.

<><><>

WEST ASIA

Asia khawthlang lam buaina a thuk zual zel a. Israel chuan nimin khan Tehran-a Internal Security Command Centre leh Basij te an kap a. Israel Defence Force (IDF) sawidanin command centre an bitum hi Iran ram pumpuia venhimna lam thununna hmunpui a ni a. IDF te hian Iran missile kahchhuahna leh an khawl pawimawhte an kap chhe bawk a ni.

Hetihlai hian Human Rights Activists News Agency (HRANA) te chuan February ni 28 atang khan Iran ah hian civil mi 1097 an thi tawh niin a sawi a ni.

<><><>

PM

Prime Minister Narendra Modia chuan Free Trade Agreement chuan eizawna kawngah kawng thar tam tak a hawng dawn a, Indian Industry ten an thilsiam chhuah quality that leh that lohah mawhpurhna sang zawk an nei dawn a ni a ti. Nimina post budget webinar ah he thu hi sawiin India chu

khawvel tana beiseina sang tak petu anih thu sawiin eibar dinhmun nghet tak
nen hmasawnna kawng chak takin a zawh a ti.

<><><>